



ATASSUT
Steen Lyngé

UPA15/7-2beh
14.04.2015.

2015-mut aningaasanut inatsisissatut siunnersuut.

(Aningaasaqarnermut Aatsitassanullu Naalakkersuisoq)

2015-mut aningaasanut inatsisissatut siunnersuutip aappassaaneerpeqarnerani ATASSUT-mit makkuninnga oqaaseqaateqassaagut:

Aallaqqaammut ATASSUT-mit Aningaasaqarnermut Aatsitassanullu Naalakkersuisoq aammalu Naalakkersuisoqatai tamakkerlugit minnerunngitsumillu Inatsisartut Aningaasaqarnermut Akileraartarnermullu Ataatsimiititaliaat Inatsisartullu Ataatsimiititaliaat tamaasa, Aningaasanut Inatsisissatut siunnersuutip ullumikkut aappassaaneerpeqarnissaata tungaanut, aningaasanut inatsisissap toqqammavigissaartumik ingerlanneqarnissaa pillugu tamaviaarlutik sulisimanerannut qujassuteqassaagut.

ATASSUT-mit assut pingaartipparput inuiaqatigiit aningaasarsiornikkut assakaasorsuata ingerlalluarnissaa aningaasanut inatsit aqutigalugu isumannaarneqartassasoq, killiffitsinnilu misigisimavugut tamanna angujartuaarneqartoq.

Aningaasanut inatsisissatut siunnersuutip siullermeerpeqarneraniit appassaaneerpeqarnissaata tungaanut allannguutit ikigisassaangitsut Naalakkersuisunit saqqummiunneqarput, tamanna pissusissamisoorpoq, tassami Inatsisartut kissaataat annertuumik naaperiarneqarsimapput aammalu inuiaqatigiit aningaasatigut nukittunerusumik inissisimanissaat qulakkeerniarlugu Inatsisartuni partiit kissaataat Naalakkersuisut sapinngisartik naapertorlugu timitalerniarsimagaat maluginiarnarpoq.

Taamaalilluni killiffitsinni aningaasanut inatsisip 2015-imi inernerissavaa IST-mi 3,5 mio. kr.-inik amigartooruteqarneq aammalu saqqummiunneqartutut allannguutissatut siunnersuutit akuerineqassappata IS-imi 40,7 mio. kr.-inik amigartooruteqarneq. Piffissamilu 2015-2018-imi



ATASSUT INATSISARTUNI

tamarmi annikinnerusumik sinneqartooruteqartarnissaq Naalakkersuisunit naatsorsuutigineqartoq aamma paasinarpoq.

ATASSUT-mit erseqqissaatigissavarput nunatta karsiata amigartooruteqartumik ingerlasinnaanera uagut nangiarinnginnatsigu, tamanna aqunneqarsinnaasumik illersorneqarsinnaasumillu ingerlassappat, matumanilu misigisimavugut inuiaqatigiit aningaasarsiornikkut ingerlarsornissaat annerpaamik pisinnaasaq naapertorlugu isumannaarniarneqartoq, taamaammatt annilaartanngilagut amigartooruteqarluta ukiualunni ingerlanissatsinnut.

ATASSUT-mit nalunaarutigissavarput sammisat qulit matumani taasissutigineqartussat peqqissaartumik akisussaassusilimmillu Aningaasaqarnermut Akileraartarnermullu Ataatsimiititaliamit inassutigineqartut tamaasa akuerseqataaffigissagatsigit aammalu matumuuna nalunaarutigissavarput aappassaaneerneqarnerata pingajussaaneerneqarneratalu akornanni misissugassat sukumiisumillu qulaajagassat suli annertummata inaarutaasumik taasisuutigineqartussap ullumikkumit allaanerulluni inerneqarnissaa ilanngullugu sillimaffigatsigu.

Taamatut naatsunnguamik oqaaseqaateqarluta Ataatsimiititaliap inassutai tamaasa taaseqataaffigissallutigit matumuuna nalunaarutigaarput, aammalu Naalakkersuisut Ataatsimiititaliallu pingajussaaneerneqarnissaata tungaanut sulilluarnissaannik kissaappagut.